

41.132
0.234
21

50





五
卷
第
一
冊

助

助

新

時


助


咸豐五年九月
五卯年正月訖

原序

粵自方冊旣陳訓詁斯尙聖作爾雅爰列諸經述者代
興其流益廣如廣雅釋名小爾雅之屬竝乃步驟矩墨
梳櫛名物牖蒙迪昧厥用宏焉顧文以足言乃後行遠
要其窮類盡變仍歸尙言一文一質若有殊科挹彼注
此初無二致夫其四坐酬對人人異情而疾徐短長輕
軒輕重之間工拙攸判拙者辭疊而義塞工者神寄而
情宣良以辭所逮者或窮而神所示者莫滯也是故出
話則視諸口吻點筆則資於助言談何容易焉可誣邪

維是代易古今方睽秦越在昔能者因地從時藻以丹青傳其音貌細碎俚野彌益增妍宋元以降寔不能爾一步屢顧猶恐失之非夫黼黻莫敢濡翰遂使言語文章此疆彼界助辭虛字大抵混茫施諸縑墨亦云斐然叩以討論率牴於口夫爾雅諸訓匪不昭融至於助言蓋乃不備是以今古之情鬱而未暢苟然依放則舛謬沓來自有書契以還未有發其緘滕而導夫先路者此吾友確山劉氏武仲助字辨略之作所為汲汲也武仲學有根柢識造崐岷凡所撰述卓犖冠古而此一編者不惟辨析秋豪亦且晦義誤讀舉正不少實爾雅之功臣藻林之金鑑也爰付開雕公之區內其它如周易通說禹貢說之屬若干卷竝宜急梓衣被來學而力有未逮埃諸它日云康熙五十年九月海城盧承炎撰





序


構文之道不過實字虛字兩端實字其體骨而虛字其性情也蓋文以代言取尙神理抗墜之際軒輊異情虛字一乖判於燕越柳柳州所由發哂于杜溫夫者邪且夫一字之失一句爲之蹉跎一句之誤通篇爲之梗塞討論可闕如乎蒙愧顓愚義存識小閒嘗博求眾書摺拾助字都爲一集題曰助字辨略其類凡三十曰重言曰省文曰助語曰斷辭曰疑辭曰詠歎辭曰急辭曰緩辭曰發語辭曰語已辭曰設辭曰別異之辭曰繼事之

助字辨別
辭曰或然之辭曰原起之辭曰終竟之辭曰頓挫之辭
曰承上曰轉下曰語辭曰通用曰專辭曰僅辭曰歎辭
曰幾辭曰極辭曰總括之辭曰方言曰倒文曰實字虛
用其訓釋之例凡六曰正訓曰反訓曰通訓曰借訓曰
互訓曰轉訓重言如庸何滋益是也省文如雖悔可追
不曰堅乎是也助語如無甯菑患之甯尹公之佗庾公
之斯二之字是也斷辭如信必也矣是也疑辭詠歎辭
如乎哉耶與是也急辭如則卽是也緩辭如斯乃是也
發語辭如夫蓋繫維是也語已辭如而思是也設辭如

雖縱假藉是也別異之辭如其于若乃是也繼事之辭
如爰乃于是是也或然之辭如容或儻使是也原起之
辭如先前初始是也終竟之辭如畢已終卒是也頓挫
之辭如孝弟也者其爲仁矣是也承上如是故然則是
也轉下如然而抑又是也語辭如夥頤馨那是也通用
如無亾猶由是也專辭如獨唯是也僅辭如稍略是也
歎辭如嗚呼噫嘻是也幾辭如將殆是也極辭如殊絕
盡悉是也總括之辭如都凡無慮是也方言如不成格
是是也倒文如與其及也及可數乎是也實字虛用如

吾今召君之今時見理出之時皆卽辭是也正訓如仁
者人也義者宜也是也反訓如故訓今方訓向是也通
訓如本猶根也命猶令也是也借訓如學之爲言效也
齋之爲言齊也是也互訓如安訓何何亦訓安是也轉
訓如容有許義故訓可猶有尙義故訓庶幾是也凡是
刺舊詁者十七參臆解者十三班諸四聲因以爲卷旣
取虛用故之訓往而若訓汝之屬雖虛猶實悉無載焉
至于元曲助字純用方言無宜闌入他日別爲一編以
附卷尾大都古辭韻語往體今言義各有歸洵用斯舛
能自得之庶幾善變且他如辨體製研風尙潮流窮源
枝分節解則有摯虞文章流別劉勰文心雕龍之屬述
之備矣所不贅焉確山劉淇撰





助字辨略卷一目錄

上平聲

通

終

容

從

其

祇

茲

記已附

祇禔祗多致通

中

空

庸

之

而

斯

雖

唯 維惟通

噫 懿附

諛 欵附

思

為

伊

綦

滋

兒

咨 訾噉附

諱 熙附

丕

時

靡

宜

彌

猗

奇

垂

祈

隨

頤

非

歸

違

初

與

危

誰

犁 梨通

幾

希

微

居

餘

胥

於 于同

諸

且

毋

除

逾

俱

呼

胡 號附

虛

如

無

須

殊

夫

乎

鳴

俞

无同通作亾

乎虜同

吁 于通

姑

徒

烏

惡通

粗

都

麤麓同又通作犮

齊

奚

伊翳通

兮

繫

皆

借

纔

唉

裁才財通

來

哉

真

因

頻

洵

純

鈞

均同

云

員通

原

爰

翻

言

渾

單

安

案通

端

判

拌通俗作拚

還

難

助字辨略卷一

確山劉洪武仲

通

史記貨殖傳是以富商大賈周流天下交易之物

莫不通得其所欲水經注今濟北東阿四十里有故

清亭即春秋所謂清者也是濟水通得清之目焉通

猶皆也又後漢書來歷傳屬通諫何言而今復背之

注云屬近也通猶共也又史記平準書故吏皆通令

伐棘上林皆通重言也又韓退之論變鹽法事宜狀

臣今通計所在百姓貧多富少中庸其次致曲朱注

云其次通大賢以下而言愚案此通字總舉之辭也

中 廣韻云堪也史記外戚世家武帝擇宮人不中用

者斥出歸之又王仲初鏡聽辭可中三日得相見可

中正適之辭猶俗云恰好也

終 廣韻云竟也書君奭我亦不敢曰其終出於不祥

漢書卜式傳上於是式終長者終猶究竟也又漢

書南越傳終今以來通使如故終今以來猶云自今

以往

空 漢書汲黯傳何空取高皇帝約束紛更之為空徒

也

容 魏志太祖紀注公軍八月至潼關閏月北渡河則

其年閏八月也至此容可大寒邪水經注雖千古茫

昧理世元遠遺文逸句容或可尋容或也容或重言

也又左傳昭公元年先王之樂所以節百事也故有

五節遲速本末以相及中馨以降五降之後不容彈

矣後漢書李固傳固狂夫下愚不達大體竊感古人

一飯之報況受顧遇而容不盡乎顏氏家訓父在無

容稱廟父歿何容輒呼此容字可辭也容之為可者

容有許意轉訓為可也又後漢書楊秉傳蓋鄭詹來而國亂四佞放而眾服以此觀之容可近乎魏志辛毗傳苟時未可容得已乎此容字與庸通豈辭也又管子齊衛之閒不容數日之行董子雨雹對然則建己之月為純陽不容都無復陰也不容猶云不應庸豈也甯也安也何也左傳莊公十四年子儀在位十四年矣而謀召君者庸非貳乎昭公十年晏平仲端委立於虎門之外四族召之無所往其徒曰助陳鮑乎曰何善焉助欒高乎曰庸愈乎漢書南越王傳

雖王之國庸獨利乎諸庸字竝甯豈之辭荀子宥坐篇女庸安知吾不得之桑落之下庸安重言也左傳襄公二十五年將庸何歸東山邵氏曰即覆說上文君死安歸之義愚案庸何重言也杜注訓庸為用恐非又莊子齊物論庸詎知吾所謂知之非不知邪庸詎知吾所謂不知之非知邪陸德明音義云李氏云庸用也詎何也服虔云詎猶未也愚案庸甯辭詎豈辭庸詎重言也非李氏用何之意服氏訓詎為未亦通未是不定之辭也如左傳隱公元年無庸將自及

此庸字乃用辭也又書益稷帝庸作歌孔注云庸用也愚案此庸字用是之辭猶云爰也

從爾雅云自也郭注云自猶從也邢疏云自亦從也轉互相訓也史記高帝紀公等皆去吾亦從此逝矣從此自此也又由也因也如漢書高帝紀陳餘亦怨獨不王已從田榮籍助兵此言自田榮所借兵也易小過九三弗過防之從或戕之此從字因辭也後漢書祭祀志注尋虞書所稱肆類於上帝是實祭天天不言天而曰上帝帝是天神之極舉帝則天神斯盡

日月星辰從可知也從可知猶言因是可知漢書宣許后傳霍光夫人顯欲貴其小女道無從師古云從因也由也後漢書文苑傳承服風問從來未有從來由來也又左傳隱公六年長惡不悛從自及也杜注云從隨也愚案隨猶尋也言相尋而及也又杜子美詩五株桃樹亦從遮又云客至從嗔不出迎此從字亦有隨意言聽其所如何而不與之校也

之廣韻云語助辭詩國風葛之覃兮又云公侯之事小雅之屏之翰論語子路有聞未之能行漢書律歷

志法一月之日二十九日八十一分日之四十三張
曲江歲初處分較天下黔黎皆朕赤子以誠告示其
或之歸韓退之進士策問是二說者其信有是非乎
抑所指各殊而學者不之能察也以上之字竝語助
辭又禮記射義又使公罔之裘序點揚解而語鄭注
云之發聲也釋云之語助愚案此如左傳介之推燭
之武孟子庾公之斯尹公之他之類亦助辭也又詩
國風焉得諼草言樹之背荀子性惡篇夫薄願厚惡
願美狹願廣貧願富賤願貴苟無之中者必求於外

故富而不願財貴而不願勢苟有之中者必不及於
外此之字竝諸辭也又大學之其所親愛而辟焉朱
注云之猶於也愚案之得爲於者詩國風于以采芣
箋謂于以猶言往以然則之有往義故轉訓爲於也
又指事之辭如論語學而時習之之謂其所學老者
安之之謂老者也又中庸夫微之顯左傳宣公十二
年廣有一卒卒偏之兩韓退之送文暢序弱之肉強
之會此之字竝而辭也又爾雅之子是子也郭注云
斥所詠邢疏云詩言之子者多矣故此釋之李巡云

之子者論五方之言是子也然則之爲語助人言之
子者猶云是此子也桃夭傳云之子彼說嫁事爲嫁
者之子漢廣之子則貞潔者之子東山之子言其妻
白華之子斥幽王各隨其事而名之故郭云斥所詠
又詩國風乃如之人兮箋云之人是人也謂莊公莊
子逍遙游之二蟲又何知注云之是也愚案此之字
是也此也戰國策今公以韓先合於秦天下隨之是
韓以天下事秦秦之德韓也厚矣韓與天下朝秦而
獨厚取德焉公行之計是其於主也至忠矣注云之

計猶此計也又論語父母唯其疾之憂左傳昭公十
六年僑聞君子非無賄之難立而無令名之患僑聞
爲國非不能事大字小之難無禮以定其位之患此
之字亦當訓是乃語助也又論語果哉末之難矣此
之字所辭也末無也末之難猶云無所難也又禮記
檀弓末之卜也鄭注云末之猶微哉荀子解蔽篇醉
者越百步之溝以爲蹶步之澮也俯而出城門以爲
小者閨也小之閨猶云小哉閨也又戰國策山東相
合之主者不惡卑名之國者可長存之卒者出土以

戍韓梁之西邊此燕之上計也注云之猶其也愚案
 此言其主苟不惡卑名而相合則其國可長存其猝
 有事則戍韓梁之西以援之也又班固論秦始皇帝
 云周歷已移仁不代母秦直其位呂政殘虐然以諸
 侯十三并兼天下極情縱欲養育宗親三十七年兵
 無所不加制作政令施於後王蓋得聖人之威河神
 授圖據狼狐蹈參伐佐攻驅除距之稱始皇正義云
 距音巨之至也愚案距通詎轉作遽遂辭也距之稱
 始皇者言遂至於并天下而稱始皇也又左傳莊公

二十二年周史有以周易見陳侯者陳侯使筮之遇
 觀之否杜注云觀六四爻變而為否也又公羊春秋
 僖公二十八年晉人執衛侯歸之於京師傳云歸之
 於者何歸於者何歸之於者罪已定矣歸於者罪未
 定也

其 易繫辭其旨遠其辭文禮記月令其日甲乙其帝
 太皞其神句芒其指物辭也又戰國策中山君喟然
 而仰歎曰與不期眾少其於當厄怨不期深淺其於
 傷心注云其指物辭猶在也愚案此其字與上義別

又詩國風誰其尸之蔡中郎祖德頌非特王道然也
賢人君子修仁履德者亦其有焉杜元凱左傳序先
儒所傳皆不其然蜀志秦宓傳君子懿文德采藻其
何傷此其字竝語助也又論語孔子於鄉黨恂恂如
也似不能言者其在宗廟朝廷便便言唯謹爾孟子
周公思兼三王以施四事其有不合者仰而思之夜
以繼日此其字是更端之辭欲別異言之故云其也
又廣韻云豈也莊子齊物論人之生也固若是也乎
其我獨芒而人亦有不芒者乎戰國策今也寡人一

城圍會不甘味臥不便席今應侯亾地而言不憂此
其情也史記叔孫通傳呂后與陛下攻苦會啖其不
肯哉此其字竝是豈辭其豈音相近故通也論語才
難不其然乎不其然猶云豈不然乎又史記高帝紀
其以沛為朕湯沐邑注引風俗通義云漢書注沛人
語初發聲皆言其其者楚言也愚案周語其叔父實
應且憎以非余一人漢書刑法志箠長五尺其本大
一寸其竹也又云有君如是其賢也此諸其字竝發
語辭其本大一寸之其則指物辭也又左傳襄公二

十五年晏子立於崔氏之門外其人曰死乎其人猶言或人某人也又漢書燕王傳其者寡人之不及與其者猶云意者疑辭也又張平子南都賦爾其川瀆則潢澧灤澍發源巖穴爾其賦更端語也又史記文帝紀其歲新垣平事覺後漢書儀禮志其日乘輿先到辟雍禮殿其日猶云是日其歲猶云是歲也又易否卦九五其亾其亾李鼎祚集解云其與幾同幾近也又詩小雅夜如何其書微子若之何其左傳成公十六年彼其子重也諸此其字竝音基語辭也又詩

國風彼其之子朱傳云其音記毛詩古音考云其或作忌詩國風叔善射忌通作記案禮記表記引詩作彼記之子左傳襄公二十七年引詩作彼己之子杜注云己音記又左傳文公十四年終不曰公曰夫己氏杜注云猶言某甲顧氏補正云夫己氏猶言彼己之子

而承上轉下語助之辭論語本立而道生是也又如論語敬事而信此而字但爲語助無所承轉去而字則不可以句也戰國策管燕得罪齊王謂其左右曰

子孰而與我赴諸侯乎注云而語辭又論語而謀動
 干戈於邦內此而字是轉語猶云而乃謀動干戈於
 邦內也禮記檀弓泰山婦人哭於墓而哀夫子使子
 路問之曰子之哭壹似重有憂者而曰然鄭注云而
 猶乃也又詩國風俟我於著乎而論語偏其反而又
 云已而已而漢書韋賢傳我雖鄙者心其好而我徒
 侃爾樂亦在而師古云而者句絕之辭愚案語已辭
 如今只之類又荀子強國篇故自四五萬而往者強
 楊注云而往猶已上也又論語而今而後而今猶云

如今而後猶云以後也顧氏日知錄云孟子望道而
 未之見集注云而讀為如古字通用朱子荅門人引

詩垂帶而厲春秋星隕如雨為證詩垂帶而厲箋云而亦如也春秋莊

公七年星隕如雨注云如而也今考之又得二十餘事易君子以蒞

眾用晦而明虞翻云而如也書顧命其能而亂四方

傳釋為如孟子九一而助趙岐云而如也夫然後之

中國踐天子位焉而居堯之宮逼堯之子是篡也劉

剡曰而當讀作如左傳隱公七年畝如忘服虔曰如

而也僖公二十六年室如懸磬注云如而也昭公四

年牛謂叔孫見仲而何注云而何如何也史記賈生傳化變而嬗韋昭曰而如也如蟬之蛻化也戰國策威王不應而此者三韓非子嗣公知之故而駕鹿呂氏春秋靜郭君泣而曰不可又曰而固賢者也用之未晚也荀子駢然而雷擊之如牆厭之說苑越諸發曰意而安之願假冠以見意如不安願毋變國俗又曰而有用我者吾其爲東周乎新序引鄒陽書白頭而新傾蓋而故後漢督郵班君碑柔遠而邇皆當作如戰國策昭奚恤曰請而不得有說色非故如何也

絺疵曰是非反如何也大戴禮使有司日省如時考之文曰然如曰禮云禮云又曰安如易樂而湛又曰不賞不罰如民咸盡力春秋繁露施其時而成之法其命如循之淮南子嘗一哈水如甘苦知矣漢樂府艾如張後漢濟陰太守孟郁修堯廟碑無爲如治高如不危滿如不溢太尉劉寬碑去鞭拊如獲其情弗用刑如弭其姦郭輔碑其少也孝友而悅學其長也寬舒如好施易王弼注革而大亨以正非當如何皆當作而愚案孟子而主癰疽與寺人瘠環此而字亦

當作如設辭也又莊子列禦寇篇如而夫者一命而
呂鉅郭注云而夫凡夫也愚案而夫猶云若人又漢
書賈誼傳死而死耳賤人安宜得如此而頓辱之哉
死而死耳猶云死則死耳又公羊春秋宣公八年冬
十月己丑葬我小君頃熊而不克葬庚寅日中而克
葬傳云而者何難也曷為或言而或言乃乃難乎而
也又左傳襄公十年乃焚書於倉門之外眾而後定
而後猶云然後也又晉語文公學讀書於口季三日
曰吾不能行也咫聞則多矣對曰然而多聞以待能

者不猶愈乎漢書鄒陽傳夫全趙之時或力鼎士校
服叢臺之下一旦成市而不能止幽王之湛患淮南
連山東之俠死士盈朝不能還厲王之西也然而計
議不得雖諸賁不能安其位亦明矣此然而猶云然
則承上之辭非轉語也又周禮旅師掌聚野之鋤粟
屋粟閒粟而用之以質劑致民注云而讀為若聲之
誤也陸德明音義云而音若愚案如若義通故而得
為若乃設辭也

祇 廣韻云適也孫奕云祇有兩音音岐者神祇之祇

音支者廣韻訓適是也漢書竇嬰傳今將軍傅太子
太子廢爭不能拔又不能死自引謝病擁趙女屏閒
處而不朝祇加懟自明揚主之過師古云祇適也音
支其字從衣史記韓長孺傳臣以三萬人眾不敵禔
取辱目注云禔亦作祇漢書鄒陽傳祇結怨而不見
德師古云祇適也音支晁氏云古文祇用多字致多
竝音支左傳襄公二十九年祇見疏也服虔本作多
論語多見其不知量也正義云古人多祇同音顧氏
日知錄云後漢書郎觀傳思過念咎務消祇悔注訓

祇為大非也案易復卦初九无祇悔九家本作多古
人多祇二字通用正字通云易无祇悔王肅陸續本
作禔案祇作禔因氏是聲近而譌非古通也廣雅云
多祇也多亦訓祇非多即古文祇字九家晁服合多
致祇為一非鄒陽傳之祇作祇從禾竇嬰傳之祇作
祇從衣皆俗本傳寫因示衣禾形相似而誤非祇祇
祇古通也愚案多見其不知量也朱注云多與祇同
云同者是即以多為祇也古字頗少多相通借九家
晁服必有依據然訓釋之文當云某字與某字通若

竟云某字卽某字所未安耳又張平子東京賦今捨
純懿而論爽德以春秋所諱而爲美談宜無嫌於往
初故蔽善而揚惡祇吾子之不知言也李善云祇是
也

斯 顧氏日知錄云爾雅云茲斯此也今考尙書多言
茲論語多言斯大學以後之書多言此文云論語之
言斯者七十而不言此檀弓之言斯者五十有三而
言此者一而已大學成於曾子之門人而一卷之中
言此者十有九語音輕重之閒而世代之別從可知

矣又論語所謂立之斯立道之斯行緩之斯來動之
斯和此斯字則辭辭之急也又論語杖者出斯出矣
左傳昭公十年戊子逢公以登星斯於是乎出楚辭
卜居將送往勞來斯無窮乎史記韓長孺傳壺遂官
至詹事天子方倚以爲漢相會遂卒不然壺遂之內
廉行修斯鞠躬君子也此斯字乃辭辭之緩也又詩
國風恩斯勤斯鬻子之閔斯禮記玉藻二爵而言言
斯鄭注云斯猶目也疏云目是助句之辭愚案語已
辭也又詩小雅有兔斯首大雅於萬斯年王融曲水

詩序粵上斯已惟暮之春此斯字語助辭也又左傳成公十三年斯是用痛心疾首暱就寡人斯是用猶云茲所以

茲爾雅云茲斯咨咎已此也邢疏云此者對彼之稱言近在是也又左傳襄公十四年今余命女環茲率舅氏之典纂乃祖考無忝乃舊此茲字語辭猶云是率舅氏之典也又揚子雲羽獵賦於茲乎鴻生鉅儒俄軒冕雜衣裳修唐典匡雅頌揖讓於前後漢書文苑傳於茲迄今情偽萬方於茲猶於是爰辭也又史

記司馬相如傳且夫邛笮西犍之與中國竝也歷年茲多不可記已漢書項籍傳今將軍爲秦將三歲矣所亾失已十萬數而諸侯竝起茲益多此茲字與滋通益也茲益重言也又詩大雅昭茲來許朱傳云茲哉聲相近古益通用也又管子公曰嗟茲乎聖人之言長乎哉此茲字與咨通歎辭也

雖論語雖曰未學吾必謂之學矣又云雖違眾吾從下詩國風雖則如燬父母孔邇雖者兩設之辭也又儀禮聘禮擯者曰寡君從子雖將拜起也此雖字猶

辭也擯者爲君致辭於賓言雖貴賤不敵亦將荅禮
故云雖也又禮記少儀問日之蚤暮雖請退可也疏
云雖假令也愚案假令者猶云即使如何也如孟子
雖閉戶可也史記屈原傳推此志也雖與日月爭光
可也其義竝同又論語仁者雖告之曰井有仁焉其
從之也雖告之曰猶云若告之曰亦假令之辭也

唯爾雅云伊維侯也邢疏云皆發語辭鄭樵云維引
辭也不絕之義也正字通云書助辭皆用惟詩助辭
多用維魯論左傳助辭多用唯愚案書益稷啟呱呱

而泣子弗子惟荒度土功論語唯我與爾有是夫此
專辭也猶云獨也書伊訓惟元祀詩大雅維此文王
論語唯何甚史記太史公自序維三代尙矣漢書張
良傳今乃立六國後唯無復立者五行志唯金沴木
此發語辭也書仲虺之誥萬邦惟懷詩大雅价人維
藩此語助辭也又左傳隱公十一年寡人唯是一二
父兄不能共億僖公四年君處北海寡人處南海唯
是風馬牛不相及也二十三年吾子淹久於敝邑唯
是脯資餼牽竭矣成公二年吾子惠徼齊國之福不

泯其社稷使繼舊好唯是先君之敝器土地不敢愛
諸唯是竝發語辭也又孟子民唯恐王之不好勇也
左傳隱公十一年不惟許國之為亦聊以固吾圉也
此唯字但辭也昭公元年不甯唯是又使圍蒙其先
君將不得為寡君老甯語助不唯是言不但此也又
孟子此唯救死而恐不贍此唯猶云是乃又廣雅云
惟豈也左傳僖公五年桓莊之族何罪而以為戮不
惟逼乎魏志王昶傳夫人有善者鮮不自伐有能者
寡不自矜伐則掩人矜則陵人掩人者人亦掩之陵

人者人亦陵之故三郤為戮於晉王叔負罪於周不
惟矜善自伐好爭之咎乎不惟猶云豈非也又史記
燕世家齊城之不下者獨唯聊莒即墨越世家吳國
精兵從王唯獨老弱與太子畱守獨唯唯獨竝重言
也又荀子性惡篇然則唯禹不知仁義法正不能仁
義法正也楊注云唯讀為雖

咨 爾雅云此也疏云與茲同魏修孔子廟碑咨可謂
命世大聖千載之師表者已漢隸字源云咨義作茲
愚案管子通茲為咨則知古咨茲通用又書堯典帝

曰咨女義暨和咨歎辭也漢書禮樂志訾黃其何不
徠下師古云訾嗟歎之辭也戰國策平原令見諸公
必爲之言曰嗟嗟乎司空馬注云嗟亦嗟也愚案訾
嗟竝通咨又書堯典帝曰疇咨若時登庸蔡注以咨
爲訪問非也疇誰也咨詠歎聲疇咨猶云誰與也

噫

歎恨聲也後漢書梁鴻傳作五噫之歌又漢書溝
洫志瓠子歌云薪不屬兮衛人罪燒蕭條兮噫乎何
以御水師古云噫乎歎辭又詩周頌噫嘻成王毛傳
云噫歎也噫救也鄭箋云噫嘻有所多大之聲也疏

云毛以爲噫嘻然嗟歎而有所戒救者成是王事之
王謂周公成王也正義云孔子見顏淵死曰噫天喪
子成湯見四面羅者曰噫盡之矣則噫嘻皆是歎聲
爲歎以救之傳因其文重分而屬之非訓噫嘻爲歎
救也此噫嘻猶上篇云嗟嗟耳毛亦以上篇重農嗟
嗟而救保介此文類之明亦噫嘻而救之又云以
嘻之下方美其成王明至而率時農夫乃在下句則
噫嘻之言未是救戒故以爲有所多大之聲謂作者
有所褒多美大而爲聲以歎之也又史記魯仲連傳

新垣衍快然不樂曰噫嘻注云噫者不平之聲嘻驚恨之歎又詩大雅懿厥哲婦為臬為鴟鄭箋云懿有所痛傷之聲也正義云懿與噫字雖異音義同金滕云噫公命我勿敢言與此同也噫者心有不平而為聲云有所痛傷之聲

諄 廣韻云痛聲徐氏云痛而呼之言也史記趙世家簡子召之曰諄又莊子養生主文惠君曰諄善哉技蓋至此乎此諄字歎美辭也又漢書翟義傳熙我念孺子若涉淵水師古云熙歎辭愚案噫懿熙諄並通

諛 漢書韋孟傳在予小子勤諛厥生注云諛歎聲許其切楊升菴云方言楚謂然曰諛說文云謦也離騷欵秋冬之緒風說文云欵謦也二字音義並同實一字耳皆楚辭也愚案漢書之諛離騷之欵並是歎聲方言之諛乃荅辭也義各不同說文訓謦者從乎方言而為辭非訓漢書離騷也又案欵一音於開切與唉同

丕 爾雅云大也書大禹謨嘉乃丕績
思 詩大雅思齊大任朱傳云思語辭魯頌思樂泮水

朱傳云思發語辭又國風不可求思毛傳云思辭也
愚案凡思字在句端者發語辭也如伊維之類在句
尾者語已辭也如今而之類

時

爾雅云是也詩國風奉時辰牡書舜典惟時懋哉

又詩大雅於時言言於時語語於時猶於是也又後
漢書竇武傳臣惟膺等建忠抗節志經王室此誠陛
下稷禹伊呂之佐而虛爲奸臣賊子之所誣枉天下
寒心海內失望惟陛下留神澄省時見理出以厭人
鬼喁喁之心注云時謂卽時也愚案如魏志太祖紀

妾肥不得時出文帝紀注太祖不時立太子明帝紀
及宣王至遼東霖雨不得時攻諸時字竝卽辭也又
漢書高帝紀時飲醉臥王訢傳不如時有所寬以明
恩貸趙充國傳先零豪言顧時渡湟水北此時字猶
云閒也非常如此故云時也又漢書高帝紀高祖爲
亭長乃以竹皮爲冠令求盜之薛治時時冠之時時
猶常常也

爲 論語知之爲知之不知爲不知又云子爲誰爲仲
由孟子不爲不多矣爲猶是也又論語奚其爲爲政

上爲字無義乃語聲也如公羊春秋哀公十四年傳制春秋之義以俟後聖以君子之爲亦有樂乎此也楚辭漁父何故懷瑾握瑜而自令見放爲史記越世家莊生曰獨以德爲可以除之漢書趙后傳帝曰今故告之反怒爲世說向客疊疊爲來逼人諸爲字竝語辭也又史記越世家王素信莊生曰今爲柰何陸賈傳陳平曰然爲之柰何今爲柰何爲之柰何猶云將柰何亦語辭也又荀子王霸篇既能當一人則身有所榮而爲楊注云而爲皆語助也愚案語餘聲也

又魯語其爲後世昭前之令聞也晉語爲後世之見之也注竝云爲使也宋庠補音作平聲又漢書高帝紀趙王武臣爲其將所殺此爲字猶云被也又漢書蕭望之傳今將軍規撫云若管晏而休遂行日昃至周召乃畱乎師古云問望之立意當趣如管晏而止爲欲恢廓其道日昃不會追周召之迹然後已乎愚案遂行日昃之上當有抑字作轉故師古云爲欲則爲字亦抑辭也晉書謝道韞傳嘗譏謝元學植不進曰爲塵務經心爲天分有限耶二爲字竝是抑辭又

韓退之進平淮西碑文表間命震駭心識顛倒非其所任爲愧爲恐此爲字亦語辭猶云以愧以恐載愧載恐也又禮記檀弓曾子曰喪有疾食肉飲酒必有草木之滋焉以爲薑桂之謂也以爲疑辭猶云意謂也又禮記文王世子武王對曰夢帝與我九齡文王曰女以爲何也此以爲謂辭也女以爲何猶云女謂何如也史記淮南王世家乃復問被曰公以爲吳興兵是邪非邪被曰以爲非也公以爲者謂辭被曰以爲者意謂之辭也又檀弓高子臯之執親喪也泣血

三年未嘗見齒君子以爲難以爲難猶云謂之難也又漢書刑法志引孫卿云世俗之爲說者以爲治古者無肉刑有象刑墨黥之屬菲履赭衣而不純是不然矣以爲治古則人莫觸罪邪豈獨無肉刑哉亦不待象刑矣以爲人或觸罪矣而直輕其刑是殺人者不死而傷人者不刑也前以爲謂辭也後兩以爲將謂之辭也又左傳隱公三年衛莊公娶於齊東宮得臣之妹曰莊姜美而無子衛人所爲賦碩人也公羊春秋隱公三年傳先君之所爲不與臣國而納國於

君者以君可以爲社稷宗廟主也所爲猶云所以又
論語學而時習之朱注云學之爲言效也吳氏云爲
言言辭也謂孔子之辭卽彼字之義也又左傳昭公
元年趙孟曰秦君何如對曰無道趙孟曰亾乎對曰
何爲一世無道國未艾也何爲猶云豈然又論語何
爲則民服此何爲猶云何以荀子子道篇今夙興夜
寐耕耘樹藝手足胼胝以養其親無此三者則何以
爲而無孝名也何以爲卽何以復云爲者語辭也又
漢書揚雄傳譬若江湖之雀勃解之鳥乘雁集不爲
之多雙鳧飛不爲之少不爲之猶云不以爲也

靡爾雅云靡罔無也疏云無不有也詩國風三歲爲
婦靡室勞矣夙興夜寐靡有朝矣靡室勞言無處不
勞也靡有朝言不可以朝夕計也

伊爾雅云維也注云發語辭漢書董仲舒傳伊欲風
流而令行師古云伊維也又儀禮士冠禮嘉薦伊脯
鄭注云伊維也疏云伊維也者助句辭非爲義也愚
案在句端者發語辭在句中者助辭也又詩國風不
可畏也伊可懷也鄭箋云伊當作翳猶是也漢書禮

樂志嘉承天和伊樂厥福揚雄傳伊年暮春將瘞后
土禮靈祇師古竝云伊是也愚案是維義通又陶淵
明詩豈伊君子寶豈伊猶云豈惟又張平子西京賦
豈伊不虔思於天衢豈伊不懷歸於枌榆豈伊不卽豈
不伊爲語助也

宜 廣韻云所安也孟子宜莫如舜漢書高帝紀楚兵
且破未有分地其不至固宜文帝紀寡人不佞不足
以稱願請楚王計宜者景帝紀高皇帝廟宜爲帝者
太祖之廟孝文皇帝廟宜爲帝者太宗之廟諸宜字

應合之辭也又宋文帝與江夏王義恭書宜應慨然
立志念自我抑宜應重言也又後漢書五行志天戒
若曰卓不當專制奪矯如白衣無宜闌入宮也無宜
猶云不應又漢書張騫傳從蜀宜徑師古云宜猶當
也愚案此宜字意計而未定之辭如左傳成公二年
異哉夫子有三軍之懼而又有桑中之喜宜將竊妻
以逃者也孟子宜若可爲也漢書律歷志今陰陽不
調宜更歷之過也諸宜字其義竝同又漢書刑法志
豈宜唯思所以清原正本之論刪定律令丙吉傳遺

詔所養武帝曾孫名病已在掖庭外家者通經術有
美材行安而節和願將軍詳大議參以著龜豈宜
顯先使入侍令天下昭然知之然後洩定大策豈宜
猶云無亦豈有疑義蓋欲其如此而未敢遽定之辭
又漢書賈誼傳賤人安宜得如此而頓辱之哉安宜
猶云豈可

綦 極也荀子仲尼篇彼非本政教也非致隆高也非
綦文理也楊注云非極有文章條理也

彌 爾雅云終也郭注云終竟也愚案如世說詣黃叔
度乃彌日信宿此彌字竟也如史記五帝紀舜居滌
汭行彌謹此彌字益也愈也又吳志大帝傳性多嫌
忌果於殺戮暨臻末年彌以滋甚聖教序彌益厚顏
顏師古漢書敘例傳寫既多彌更淺俗彌滋彌蓋彌
更竝重言也又後漢書楊震傳方今災害發起彌彌
滋甚注云彌彌猶稍稍也愚案稍稍漸也

滋 孟子則弟子之惑滋甚史記竇嬰傳是以竇太后
滋不悅魏其等家語三命滋益恭滋益也滋益重言
也

猗 書秦誓斷斷猗詩國風河水清且漣猗猗兮猶語

已辭也又詩周頌猗與漆沮朱傳云猗與歎辭

兒 方言語助辭宋太祖夜幸後池召當直學士盧多

遜賦新月詩請韻曰些子兒

奇 最也水經注沁水又東南陽阿水左入焉水北出

陽阿川南流逕建興郡而其水又東南流逕午壁亭

東而南入山沿波漱石瀟瀟八丈環濤鼓轉西南流

入於沁水又南五十餘里沿上下步逕裁通小竹細

筍被於山渚蒙龍拔密奇爲翳薈也又云沁水東逕

野川縣故城北水北有華嶽廟廟前有攢柏數百根

對郭臨川負岡蔭渚青青彌望奇可玩也宋本奇爲

翳薈作最爲翳薈

垂 幾也將及之辭蜀志先主傳今大事垂可立如何

釋此去乎水經注昔燕齊遼曠分置營州今城屆海

濱海水北侵城垂淪半王右軍帖吾年垂耳順

危 漢書宣元六王傳我危得之孟康曰危殆也師古

云危者猶今之言險不得之矣趙后傳今兒安在危

殺之矣師古云危險也猶今人言險不殺耳愚案險

幾將之辭也危殺之危猶云殆也

祈 禮記緇衣資冬祈寒鄭注云資當為至齊魯之語

聲之誤也祈之言是也齊西偏之語也

誰 爾雅云疇孰誰也郭注云易疇離祉邢疏云皆謂

語辭不為義也又詩陳風誰昔然矣爾雅云誰昔昔

也郭注云誰發語辭朱傳云誰昔猶言疇昔也又廣

韻云何也杜子美詩只道梅花發誰知柳亦新

隨 襄陽耆舊傳韓係伯鄰居種桑樹於界上以為誌

係伯以桑枝蔭妨他地遷數尺鄰畔隨復侵之隨尋

也又世說下官家故有兩娑千萬隨公所取此隨字

任從之辭也

犁 史記晉世家犁二十五年吾冢上柏大矣索隱云

犁猶比也愚案比及之辭也又呂后紀犁明孝惠還

徐廣云犁猶比也犁明者將明之辭又酷吏傳其頗

不得失之旁郡國黎來會春溫舒頓足歎索隱云梨

音犁比也愚案此言不得即報殺之囚或失之於旁

郡及求得已直春不可行誅戮故頓足歎也梨犁通

故竝訓比

頤 史記陳涉世家客曰夥頤涉之爲王沈沈者索隱云楚人謂多爲夥頤者助聲之辭也漢書注應劭云夥音禍正字通云楚音讀夥如槐上聲愚案漢書陳涉傳省頤字蓋夥頤者驚歎之聲竝有聲無字夥之餘聲便是頤故漢書省去也有頤字其聲舒無頤字其聲促又應劭以沈沈爲宮室深邃之貌非也陳蔡光黃閒人言如此則云正樣其呼正字如沈去聲蓋客驚歎涉之富貴至於如此也

幾 爾雅云近也易小畜上九月幾望論語不幾乎一言而興邦乎漢書高帝紀豎儒幾敗迺公事幾者將欲及之也左傳襄公二十八年楚不幾十年未能恤諸侯也杜注云幾近也愚案不幾猶云不及又孟子王庶幾改之庶幾冀幸之辭也又韓非說難說之者能無嬰人主之道鱗則幾矣索隱云謂庶幾於善諫說愚案則幾矣者言近於善諫也索隱云庶幾與庶幾改之義別

非 廣韻云不是也書大禹謨眾非元后何戴后非眾罔與守邦又大禹謨可愛非君可畏非民此非字猶

云豈非省文也又漢書陳餘傳陳王非必立六國後
師古云非不也又漢書高帝紀燕吏民非有罪也非
有猶云無有又周亞夫傳上視而笑曰此非不足君
所乎師古云帝言賜君食而不設箸此由我意於君
有不足乎愚案此非字猶云豈也不足不副其意也
君謂亞夫不足君所倒文也言此地豈君不足之所
乎蓋陽笑而實怒之又終軍傳偃矯制而鼓鑄者欲
及春耕種贍民器也今魯國之鼓當先具其備至秋
乃能舉火此言與實反者非師古云重問之愚案軍

以爲徐偃矯制名不應實故云此言與實反邪抑非
也此非字疑辭猶云否也故師古云重問之又孟子
此莫非王事我獨賢勞也莫非猶云無非又孟子城
非不高也池非不深也非不猶云未嘗不反設之辭
也又庾子山哀江南賦將非江表王氣終於三百年
乎將非猶云將無又史記文帝紀今法有肉刑三而
姦不止其咎安在非乃朕德薄而教不明與非乃猶
云無乃

希爾雅云罕也論語三世希不失矣正義云希少也

愚案希不失猶云鮮有不失

歸 終竟之辭後漢書袁術傳雖假符僭稱歸將安所
取容哉

微 論語微管仲馬注云微無也晉書列女傳一朝辭

漢曾微戀舊之情曾微猶云乃無又詩國風微君之

故胡為乎中露此微字非辭也又漢書趙充國傳微

將軍誰不樂此者顧氏日知錄云言豈獨將軍苟安

貪便人人皆欲為之師古以微字屬上句讀非愚案

微將軍猶言非獨將軍省文也又莊子盜跖篇柳下

季曰今者闕然數日不見車馬有行色得微往見跖

耶得微猶云得非得無又魏文帝與吳質書孔璋章表

殊健微為繁富此微字頗辭也又顏氏家訓雖讀禮

傳微愛屬文此微字不辭也又禮記檀弓曾子聞之

曰微與其嗟也可去其謝也可會鄭注云微猶無也

無與止其狂狷之辭正義云微無也與語助言餓者

無得如是與愚案此微字是毋辭與有無之無義別

故鄭氏云猶無也

違 中庸忠恕違道不遠朱注云違去也如春秋傳齊

師違穀七里之違愚案相距之辭

居 易繫辭亦要存亾吉凶則居可知矣正義云或此

卦存之與亾吉之與凶但觀其中爻則居然可知矣

愚案詩大雅居然生子鄭箋云徒以禋祀而無人道

居默然自生子正義云空祀神明而無人道交接故

居位默然而得生子朱傳云居然猶徒然也鄭說固

非而徒然之義亦無所明又案生民詩上帝居歆箋

云上帝則安而歌響之訓居為安於義為協然則易

云居可知者謂觀其中爻則吉凶存亾之故安然而

知之矣詩云居然生子者謂安然生子而無有災害

也又史記魯世家旦嘗輔翼武王用事居多居多猶

云為多又詩國風日居月諸胡迭而微正義云居諸

者語助也故日月傳曰日乎月乎不言居諸也日居月諸

照臨下土毛傳云日乎月乎臨照之也又禮記檀弓何居我未之前聞

也鄭注云居讀為姬姓之姬齊魯之間語助也陳氏

集說云何居怪之之辭猶言何故也莊子齊物論何

居乎形固可使如槁木而心固可使如死灰乎司馬

彪云居猶故也左傳襄公二十三年誰居其孟椒乎

杜注云居猶與也音基愚案與辭也

初 廣韻云始也左傳隱公五年於是初獻六羽史記
外戚世家天下初定未久初定猶云方定又史記陳
涉世家初陳王至陳伍子胥傳伍子胥初所與俱亡
故楚太子建之子勝者在於吳初者追原之辭也又
魏志太祖紀注初不中風但失愛於叔父故見罔巨
此初字猶云本也陶淵明詩真想初在衿言真想本
在襟抱也又世說謝夫人問太傅那得初不見君教
兒又云謝遏諸人共道竹林優劣謝公云先輩初不
臧貶七賢此初字猶云自來從來也又後漢書獨行
傳受教三日初不奉行廢命不忠豈非過邪初不奉
行猶云全不奉行言自初及終不奉行也

餘 廣韻云贍也漢書外戚恩澤侯表其餘后父據春
秋褒紀之義帝舅緣大雅申伯之意滯廣博矣宇文
道庾子山集序自餘文人莫有逮者其餘自餘猶言
其他也又漢書諸侯王表封國八百同姓五十有餘
禮樂志河間獻王采禮樂古事稍稍增輯至五百餘
事此餘字奇零之辭又危稹漁家傲詞老去諸餘情

味懶諸餘猶云一切

與 通歎廣韻云語末之辭增韻云疑詞也愚案疑詞如論語然則師愈與唯求則非邦也與公羊傳桓公九年春秋有譏父老子伐從政者則未知其爲在齊與在魯與是也語末辭如論語其爲仁之本與中庸舜其大孝也與是也凡語末辭詠歎之意居多如論語君子人與君子人也一是詠歎一是洩辭朱注以其爲仁之本與及君子人與竝作疑辭恐非又漢書武帝紀猗與偉與師古云與辭也愚案此亦詠歎之

辭猶典引云唐哉皇哉也又左傳僖公二十三年其人能靖者與有幾顧氏補正云邵氏云此倒語也若曰其有幾人能靖者與陸氏釋文云與字句絕又昭公十七年梓慎曰往年吾見之是其徵也火出而見今茲火出而竟必火入而伏其居火也久矣其與不然乎邵氏曰其與語辭猶云其諸也又周語若壅其口其與能幾何晉語苗棼皇曰邵子勇而不知禮矜其伐而恥國君其與幾何周語之其與指監誦一事而言也晉語之其與指邵至而言也幾何猶云能幾

何言不能久也又晉語今我戰又勝荆與鄭吾君將
伐知而多力怠教而重斂大其私暱而益婦人田不
奮諸大夫田則焉取以益此諸臣之委室而徒退者
將與幾人韋注云與辭也幾人言必多也愚案將與
幾人猶云當復幾人句中有頓挫語氣故云與以足
之也

胥 爾雅云僉咸胥皆也郭注云東齊曰胥見方言邢
疏云方言云僉胥皆也自山而東五國之郊曰僉東
齊曰胥是也又廣韻云相也書太甲民非后罔克胥

匡以生詩小雅無淪胥以貶又詩小雅君子樂胥侯
氏燕胥朱注云胥語辭愚案語已辭也又史記倉公
傳若非其人也胥與公往見之徐廣曰胥猶言須也
於 同于爾雅云爰于也曰也粵曰也于也愚案於得
爲爰粵曰者發語辭也易繫辭於稽其類其衰世之
意邪孟子於答是也何有史記吳太伯世家師古云
吳言句者夷之發聲猶言於越也淮南子原道訓於
越生葛絺高注云於發聲又韓退之賀冊尊號表陳
請懇至于再于三此于字亦發語辭也又詩國風于

以采藝鄭箋云于以猶言往以漢書禮樂志修其舊
文放鄭近雅述而不作信而好古於以風示海內揚
名後世誠非小功小美也於以猶云爰以亦發語辭
也又中庸馨色之於以化民末也此於以猶言用以
又廣韻云語辭也書舜典肆類于上帝禋于六宗詩
國風王于興師論語子禽問於子貢曰夫子至於是
邦也孟子王如知此則無望民之多於鄰國也此於
字竝助語辭不爲義也又左傳宣公十二年其君無
日不討國人而訓之于民生之不易杜注云于曰也

愚案訓之于民生之不易猶云訓之以民生之不易
亦助語辭也又儀禮士冠禮髦士攸宜宜之于假鄭
注云于爲也假大也宜之是爲大矣司馬長卿長門
賦敘因于解悲愁之辭李善云鄭氏儀禮注云于爲
也愚案爲語助辭非作爲之爲又廣韻云居也愚案
居猶云在也詩國風于沼于汔于澗之中論語於子
與改是又云始吾於人也又云君子之於天下也又
云於我殯左傳襄公九年於我未病楚不能矣孟子
於傳有之史記五帝紀高辛於顓頊爲族子張平子

南都賦於其陂澤則有鉗盧玉池楮陽東陂於之得
爲在者左傳襄公八年寡君在君君之臭味也在合
訓於則於亦得爲在也又史記周紀爲王計者周於
秦因善之不於秦亦言善之於秦猶云從秦從與在
義相近也又書堯典黎民於變時雍漢書成帝紀作
於蕃時雍應劭云言眾民於是變化用是大和也愚
案訓於爲于是者以於爲省文也又史記春申君傳
有觀津人朱英謂春申君曰人皆以楚爲強而君用
之弱其於英不然其於猶云至於又書金縢于後公

乃爲詩以貽王名之曰鴟鴞庾子山哀江南賦於時
朝野歡娛池臺鐘鼓于後猶云其後於時猶云其時又音
烏歎美辭也書堯典僉曰於赫哉疏云於卽鳴字歎之辭也
虛 空也徒也漢書匡衡傳臣竊恨國家釋樂成之業
而烏爲此紛紛也

諸 廣雅云於也廣韻云之也旃也顧氏日知錄云之
於爲諸之乎爲諸愚案論語其如示諸斯乎之於辭
也雖有粟吾得而食諸之乎辭也又詩國風日居月
諸照臨下土毛傳云日乎月乎照臨之也柏舟正義

云居諸語助也故日月傳云日乎月乎不言居諸也
檀弓云何居我未之前聞也注云居語助也左傳云
臯陶庭堅不祀忽諸服虔云諸辭也是居諸皆不爲
義也又論語其諸異乎人之求之與正義云諸與皆
語辭愚案日居月諸之諸語已辭也其諸異乎之諸
語餘聲也又公羊傳哀公六年陳乞使人迎陽生於
諸其家此諸字亦語助辭也又禮記祭義勿勿諸其
欲其饗之也陳氏集說云諸語辭猶然也又廣韻云
非一也史記封禪書諸明年凡山他名祠行過則祠

行去則已注云諸字是統括字舉明年凡山以統其
餘也愚案如漢書宣帝紀自今諸有大父母父母喪
者勿繇事魏志路粹傳注凡說融諸如此輩辭語甚
多此諸字竝統括之辭也

如廣韻云若也論語弗如也吾與女弗如也漢書張
釋之傳吏不當如此邪昌邑王傳陛下左側讒人眾
多如是青蠅惡矣又易離卦九四突如其來如突如
猶云突然來如之如則語已辭也漢書敘傳榮如辱
如有機有樞二如字竝語已辭又論語如不可求如

有用我者此如字脫或之辭也史記越世家此朱公之金有如病不宿誠後復歸魏世家有如彊秦亦將襲趙之欲則君且柰何有如亦脫或辭也又漢書張釋之傳有如萬分一假令愚民取長陵一抔土有如假令竝若或之辭重言也又史記馬服君傳卽有如不稱妾得無隨坐乎卽若辭卽有如亦重言也又廣韻云似也論語申申如也天天如也正義云如者如此義也謂體貌和舒如似申申天天也故玉藻云受一爵而色洒如也及鄉黨每云如也者皆謂容色如

此又袁盎傳承相如有驕主色師古云如似也世說林公謂王右軍云長史作數百語無非德音如恨不苦注云苦謂窮人以辭愚案林意以爲長史言固佳似乎所短者不能窮人以辭也晉書石勒載記張賓進曰如聞冰船盡在瀆中未上枋內如聞猶云似聞以上三如字竝未定之辭又左傳僖公二十二年若愛重傷則如勿傷愛其二毛則如服焉公羊春秋隱公五年鄭伯克段于鄆傳云母欲立之已殺之如勿與而已矣注云如卽不如齊人語也愚案如之訓不

如猶可之訓不可省文也又論語如其仁如其仁孔氏云誰如管仲之仁愚案此亦省文言何如其仁也又論語安見方六七十如五六十而非邦也者儀禮鄉飲酒禮公如大夫入鄭注云如讀為若愚案若及也言公及大夫入也又孟子寡人如就見者也此如字將辭如似也故可通為將又廣韻云而也春秋莊公七年四月辛卯夜恆星不見夜中星隕如雨左傳曰星隕如雨與雨偕也劉歆云如而也星隕而且雨故曰與雨偕也又戰國策夫刑名之家皆曰白馬非

馬也已如白馬實馬乃使有白馬之為也已如猶云既而言刑名家皆謂白馬非馬既而知白馬實是馬乃使之為白馬非馬之云也又史記高帝紀誠如老父言不敢忘德又云羽使人還報懷王曰如約文帝紀代王乃笑謂宋昌曰果如公言水經注不如孟氏所說此如字謂言相應也又史記孟荀列傳自如淳于髡以下皆命曰列大夫又云自如孟子至于吁子世多有其書故不論其傳云此如字語助辭不為義也又史記越世家至如少弟者生而見我富至如猶

至于也又漢書高帝紀不如洩策東鄉不如者商校
之辭也又左傳昭公六年陽貨不能居魯而息肩于
晉所不以爲中軍司馬者有如先君顧氏補正云邵
氏云凡誓辭有如日有如河有如先君云者若謂苟
不如此將如日何如河何如先君何若謂其神臨之
必降之禍也又論語人而不仁如禮何疏云如柰也
不曰如之何如之何者鄭氏讀如作柰書高宗彤日
天既孚命正厥德乃曰其如台西伯戡黎今王其如
台蔡傳云如台柰我何也又後漢書班固傳今其如
台而獨闕也注以爲封禪之事今其如何至我而獨
闕句雖本於書而義與書別

且 廣韻云子魚切語辭詩國風匪我思且又邶風其
虛其邪既亟只且朱傳云只且語助辭又鄘風揚且
之哲也朱傳云且語助辭愚案在句中者語助之辭
在句末者語已之辭只且重聲猶云乎而也

無 有之反也論語大車無輓小車無軌又與无亾通
易皆作无廣韻云无虚无之道也漢書司馬相如傳
亾是公者亾是人也師古云亾讀曰無又虞書剛而

無虐簡而無傲論語毋友不如己者此無字與毋通
禁止辭也又論語貧而無諂富而無驕無諂無驕猶
云不諂不驕張平子東京賦宜無嫌于往初李善云
宜之言義也無猶不也漢書貢禹傳方今天下饑饉
可亾大自損減以救之稱天意乎可亾猶云可不也
又論語亾之命矣夫此言無之而非命省文也舊注
訓亾爲死亾師雖尊恐不可對其人而直歎爲將死
且亾之二字不可以句也又史記范雎傳意者臣愚
而不概于王心邪亾其言臣者賤而不可用乎此亾

字是抑辭猶云不然也漢書貨殖傳甯爵無刁

史記無作

亾孟康云刁閒能畜豪奴或有連車騎交守相奴自

謂曰甯欲免去作民有爵邪無將止爲刁氏作奴乎
無發助聲也愚案此無字亦是抑辭蓋語之轉而不
定故孟康云發助聲也如孟子無以則王乎無已則
有一焉竝是轉語義詳三卷以字條下又左傳成公
十二年如天之福兩君相見無亦唯是一矢以相加
遺焉用樂杜注云言兩君戰乃相見無用此樂愚案
卻至以爲唯兩君相見乃用備樂子反以爲兩君相

見止須用矢又何備樂之有益承卻至如天之福而
 反言之以相戲耳無亦疑辭也襄公二十四年夫令
 名德之興也德國家之基也有基無壞無亦是務乎
 凡言無亦者皆辭之不定猶孟康云無將也又左傳
 襄公九年穆姜始往東宮筮遇艮之隨史曰隨其出
 也君必速出姜曰亾杜注云亾猶無也愚案姜曰亾
 者猶云非也言非速出之義又戰國策客趨而進曰
 海大魚因反走君曰客有于此客曰鄙臣不敢以死
 為戲君曰亾更言之亾字句絕言莫如此也又詩周

頌無競維烈無競言莫有與之競也又左傳襄公三
 十年且司馬令尹之偏而王之四體也絕民之主去
 身之偏艾王之體以禍其國無不祥大焉無不祥大
 焉者猶云不祥莫大焉又論語無乃太簡乎左傳宣
 公十二年子有軍事獸人無乃不給于鮮無乃疑辭
 也又莊子德充符子產蹇然改容更貌曰子無乃稱
 此云無乃猶云無為如此也又世說將無以德掩其
 言孟嘉別傳哀歷觀久之指嘉曰將無是乎將無猶
 云無乃又韓詩外傳客有見周公者應之於門曰何

以道旦客曰在外卽言外在內卽言內入乎將無公
曰請入入乎將無者言將入乎抑猶未可乎疑辭也
又論語能無說乎能無猶云豈能不省文也又論語
言之得無訶乎得無能無也又史記叔孫通傳高帝
曰得無難乎漢書趙充國傳我告漢軍先零所在兵
不往擊久畱得亾效五年時不分別人而竝擊我此
得無猶云無乃又戰國策今臣使於秦而三日不見
無有爲臣爲鐵銛者乎注云無有言得無有也又漢
書成帝紀有青蠅無萬數集未央宮殿中朝者坐師

古云言其極多雖欲以萬數計之而不可得故曰無
萬數愚案此云無猶云不啻也又孟子無非事者無
非猶云皆是又漢書項羽傳楚戰士無不一當十無
不皆辭也又漢書高帝紀父子俱屠無爲也無爲猶
云莫如此又論語無以爲也仲尼不可毀也無以爲
卽高紀無爲之義言不得如此也漢書賈捐之傳臣
愚以爲非冠帶之國禹貢所及春秋所治皆可且無
以爲此無以爲謂且不必以此爲事也又漢書司馬
相如傳朕以覽聽餘閒無事棄日師古云言聽政餘

暇不能棄日也愚案無事棄日猶言不可棄日魏志臧洪傳洪於大義不得不死念諸君無事空與此禍此無事猶云不必言諸君可以無死也又荀子勸學篇諂諛者親諛諍者疏修正為笑至忠為賊雖欲無滅亾得乎哉楊注云亾通作惡又後漢書馮衍傳饑者毛會注云毛與無同方氏通雅云江楚廣東呼無為毛黃幡綽賜緋毛魚袋則古有此語矣

毋

廣韻云止之辭又論語子絕四毋意毋必毋固毋我程子云此毋字非禁止之辭聖人絕此四者何用

禁止朱注云毋絕無之盡史記作無是也又詩大雅毋念爾祖聿脩厥德小爾雅廣訓篇云無念念也愚案無無亦也言無亦重念爾祖而聿脩厥德也

須

應也宜也應璩與滿公炎書適有事務須自經營未書謝靈運傳若前有浮聲則後須切響

除

宋史岳飛傳楊么云欲犯我者除是飛來除是猶云唯有今云除非是也晏叔原長相思詞問相思甚了期除非相見時

殊

詩國風殊異乎公路漢書韓信傳軍皆殊死戰師

古曰殊絕也謂沒意必死也愚案殊云絕者極辭也
今云絕如此絕不如此猶云了如此了不如此也非
特爲沒意之辭而已如漢書昌邑王傳前賀西至長
安殊無臬魏文帝與吳質書孔璋章表殊健襄陽者
舊傳諸葛孔明拜龐德公於牀下公殊不令止江淹
擬古詩日暮碧雲合佳人殊未來竝是了辭絕辭豈
可云洩然無臬章表洩健乎

逾 彌也愈也莊子人有畏影惡迹而去之走者舉足
逾數而迹逾多柳柳州詩石泉遠逾響

夫 孝經諫諍章注疏云夫發言之端劉瓛云夫猶凡
也爾雅郭敘夫爾雅者邢疏云夫者發語辭亦指示
語左傳隱公四年夫州吁阻兵而安忍阻兵無眾安
忍無親眾叛親離難以濟矣夫兵猶火也弗戢將自
焚也夫州吁弑其君而虐用其民於是乎不務令德
而欲以亂成必不免矣連用三夫字蓋易繫辭是故
之例又論語唯我與爾有是夫史記孔子世家吾歌
可夫此夫字語已辭猶云有是哉可哉也又左傳昭
公七年日君以夫公孫段爲能任其事而賜之州田

史記曰者傳此夫老子所謂上德不德是以有德此夫字語助辭也又管子夫天不墜地不沈夫或維而載之也夫又況於人人有治之辟之若夫雷鼓之動也四夫字竝兼上義又論語夫人不言夫人猶云是人禮記祭義君子有終身之喪忌日之謂也忌日不用非不祥也言夫曰志有所至不敢盡其私也注云夫曰猶此日又左傳襄公八年夫人愁痛不知所庇杜注云夫人猶人人也楚辭少司命夫人自有兮美子五臣注云夫凡也鬼谷子與蘇秦張儀書夫女愛不極席男歡不卑輪痛哉夫君夫君猶云之子李義山詩所謂之子夫君鄭與裴者也又左傳襄公二十七年宋之會叔向謂趙文子曰且吾因宋以守病則夫能致死與宋致死雖倍楚可也正義云夫謂宋也愚案此夫字亦是人人之辭省文也又管子桓公視管仲云樂夫仲父漢書司馬相如傳微夫斯之爲符也樂夫微夫猶云樂哉微哉也又戰國策是以侯王稱孤寡不穀是其賤之本與非夫注云非夫猶云非耶

俱 史記秦紀蜚廉善走父子俱以材力事殷紂彭越
 傳妾謹與俱來俱皆也同也又左傳僖公九年送往
 事居耦俱無猜貞也杜注云耦兩也送死事生兩無
 猜眼所謂正也

乎 說文云語之餘也愚案語已之辭也然有兩義一
 是詠歎之辭如論語必也正名乎其如示諸斯乎以
 與爾鄰里鄉黨乎之類是也一是不定之辭如論語
 信乎夫子不言不笑不取乎孟子亦將有以利吾國
 乎之類是也柳柳州所謂疑辭者也又漢書食貨志

法錢不立吏急而壹之虐則大為煩苛而力不能勝
 縱而弗呵虐則市肆異用錢文大亂虐同乎此兩乎
 字兩設之辭也又中庸所求乎臣所求乎子此乎字
 猶云於也又論語君子去仁惡乎成名正義云惡乎
 猶於何也愚案惡乎猶云何所又漢書地理志痛乎
 道民之道可不慎哉痛乎猶云痛哉亦歎辭也又論
 語女得人焉曰乎疏云曰乎語助辭又公羊傳莊公
 二十四年見用幣非禮也然則曷用棗栗云乎服脩
 云乎曰乎云乎竝語已辭然求之本文之義則曰乎

是不定之辭云乎是詠歎之辭也又荀子正論篇期
 臭味曼而饋代畢而會雍而徹乎樂論篇曷以知舞
 之意曰目不自見目不自聞也然而詔俯仰詘信進
 退遲速莫不廉制盡筋骨之力以要鐘鼓俯會之節
 而靡有悖逆者眾積誹誹乎戰國策支期先入謂王
 曰偽病者乎而見之臣已恐之矣兩乎字猶云焉也
 呼 檀弓曾子聞之瞿然曰呼注云呼歎辭也

嗚呼歎辭一作於戲嗚呼嗚呼嗚呼嗚呼於
 乎小爾雅廣訓篇云烏乎吁嗟也吁嗟嗚呼也有所

歎美有所傷痛隨事有義也愚案如大學於戲前王
 不忘此歎美之辭也如書五子之歌嗚呼曷歸此傷
 痛之辭也又如伊訓泰誓諸云嗚呼只是歎辭非有
 所贊美傷痛也

胡 廣韻云何也詩國風胡能有定又漢書郊祀志引
 周頌曰不吳不敖胡考之休師古云何壽之美者歎
 之之言也又詩國風胡然而天也胡然而帝也胡然
 猶云何以如此又詩國風淑人君子正是國人胡不
 萬年胡不猶云豈不言君子能長人何有不萬年也

又後漢書鄭元傳自非拜國君之命問族親之憂展
 敬墳墓覲省野物胡嘗扶杖出門乎胡嘗何嘗也又
 莊子列御寇篇闔胡嘗視其良既為秋柏之實矣闔
 盍通何不也闔胡重言也又通作號荀子哀公篇魯
 哀公問於孔子曰紳委章甫有益於仁乎孔子蹙然
 曰君號然也楊注云號讀為胡聲相近也案家語作
 君胡然也

俞 廣韻云然也荅也書堯典帝曰俞予聞如何漢書
 司馬相如傳於是天子沛然改容曰俞乎朕其試哉
 師古云俞者然也愚案內則男唯女俞然則俞為應
 之緩也

吁 廣韻云歎也徐氏云語之舒也書堯典吁嚚訟可
 乎孔傳云吁疑怪之辭蔡注云歎其不然之辭又詩
 國風于嗟麟兮于嗟猶吁嗟
 姑 六書統云且須之意書酒誥姑惟教之詩國風我
 姑酌彼金罍說文引詩姑作夙

徒 論語夫召我者而豈徒哉正義云徒空也言夫人
 召我者豈空然哉愚案如孟子徒善不足以為政徒

法不能以自行禮記檀弓孔子曰異哉徒使我不誠
 於伯高竝空辭也又漢書汲黯傳上曰君薄淮陽邪
 吾今召君矣顧淮陽吏民不相得吾徒得君重臥而
 故治之師古云徒但也又史記春申君傳非徒然也蕭
 相國世家徒持文墨議論此徒字空但二義竝通又
 史記刺客傳前日所以不許仲子者徒以親在荀子
 子道篇子路出謂子貢曰吾以夫子為無所不知夫
 子徒有所不知子貢出謂子路曰女謂夫子為有所
 不知乎夫子徒無所不知此徒字竝特辭也又莊子
 天地篇吾聞之夫子事求可功求成用力少見功多
 者聖人之道今徒不然此徒字猶云獨也

烏 廣韻云安也語辭也廣雅云豈也愚案安豈義同
 戰國策烏能與齊懸衡班固東都賦烏覩大漢之云
 為乎又漢書司馬相如傳烏有先生者烏有此事也
 師古云烏於何也愚案於何亦安豈之義猶云安在
 也又通惡孟子惡在其為民父母也又云居惡在仁
 是也路惡在義是也又云惡乎宜乎抱關擊柝又孟
 子惡是何言也趙注云惡者不安事之歎辭也

粗 與麤鹿狝竝通廣韻云畧也漢書敘傳狝舉僚

竝列其人師古云狝大畧也世說謝粗道其義又云
沖乃粗下意又云阿鄴故麤有才具案師古以狝爲
才戶反廣韻以麤鹿狝爲倉胡切又以粗狝爲徂苦
切平上去三音竝收

都 廣韻云猶總也魏文帝與吳質書頃撰其遺文都
爲一集水經注西極大楊川望黃沙猶若人委干楛
於地都不生草木世說於時天月明淨都無纖翳又
司馬相如封禪文揆厥所元終都攸卒張揖云都於

也又書堯典帝曰疇咨若予采驩兜曰都蔡傳云都
歎美之辭也又元微之詩莫畫長眉畫短眉斜陽傷
豎莫傷垂人人總解爭時勢都大須看各自宜都大
猶俗云多大言如何樣大小也

齊 漢書食貨志陛下損膳省用出禁錢以振元元寬
貸而民不齊出南畝齊皆也又王仲初詩老人上壽
齊頭拜齊頭方言皆也

奚 廣韻云何也論語子奚不爲政史記平原君傳卿
以爲奚如莊子逍遙遊奚以知其然也又孟子奚而

不知也奚而不知言奚爲而不知省文也

兮 廣韻云語助愚案歌之餘聲

緊 廣韻云是也辭也詩國風所謂伊人毛傳云伊維

也鄭箋云伊當作緊猶是也愚案伊緊通用竝維辭

也左傳隱公元年緊我獨無此緊字是發語辭周語

豈緊多寵此緊字是助辭也又通緊唐書劉幽求傳

翳幽求是賴

皆 廣韻云俱辭也孟子皆是也

借 廣雅云俱也左傳僖公二十四年能如是乎與女

借隱漢書文帝紀今單于反古之道計社稷之安便

萬民之利新與朕俱棄細過借之大道師古云借亦

俱也

纒 與裁財才竝通廣韻云僅也漢書鼂錯傳遠縣纒

至史記張儀傳雖大男子裁如嬰兒漢書文帝紀太

僕見馬遺財足師古云財與纒同少也愚案少僅義

同水經注林鄣據嶮路才容軌又後漢書馮異傳旦

日赤眉使萬人攻異前部異裁出兵以救之張酺傳

宜裁加貸宥以崇厚德此裁字畧也少也又蜀志魏

延傳延大怒纔儀未發率所領徑先南歸此纔字猶云方也

唉 史記項羽傳亞父受玉斗置之地拔劍撞而碎之曰唉豎子不足與謀徐廣云唉烏來反索隱云歎恨發聲之辭

來 語助辭莊子人間世雖然若必有以也嘗以語我來晉書石勒載記每耕作於野嘗聞鼓角之聲勒以告諸奴諸奴亦聞之因曰吾幼來在家恆聞如是李義山詩一樹濃姿獨看來又云小來兼可隱針鋒

哉 說文云言之閒也詩大雅陳錫哉周朱傳云哉語辭正字通云哉之在句中者爲助語辭爲閒隔之辭在句末者爲語已辭愚案語已辭有兩義孟子不識此語誠然乎哉此疑辭也論語大哉堯之爲君也洋洋乎盈耳哉此歎辭也又論語玉帛云乎哉鐘鼓云乎哉乎哉反設之辭兼疑歎二義又論語有是哉子之迂也有是哉不足之辭後漢書列女傳霸起而笑曰有是哉此深然之辭與上義別

真 誠也信也世說孟昶見王恭乘高輿披鶴氅裘歎

曰此真神仙中人韓退之詩老翁真箇似童兒聶夷中詩地底真成有劫灰真成真箇方言真如此也

因 廣韻云仍也緣也漢書高帝紀單父人呂公善沛令辟仇從之客因家焉又云呂公者好相人見高祖狀貌因重敬之又云行數里醉因臥又云人乃以姬爲不誠欲苦之姬因忽不見此因字竝是緣辭因家焉者緣沛令故因重敬之者緣狀貌故因臥者緣醉因忽不見者緣眾欲苦之也漢書賈誼傳至於俗流失世禍敗因恬而不知怪此因字仍辭也因恬而不知怪者仍其流失禍敗而不知怪也又漢書王商傳何因當有大水一日暴至何因何緣也又史邦卿齊天樂詞孤箏幾柱問因甚參差暫成離阻因甚緣何也又戰國策趙王曰卿不遠趙而惠教以國事願於因計鮑注云因非正爲之猶秦王謂陳軫以其餘爲寡人計也

頻 廣韻云數也比也易復卦六三頻復巽卦九三頻巽王昭素訓頻爲數朱子訓頻爲屢愚案三爻承初爻二爻爲辭雖有屢數之意然其本義似相因仍而

明字辨
爲復異則頻乃仍辭也漢書文帝紀閒者數年比不
登注云比猶頻也武帝紀今大將軍仍復克獲師古
云仍頻也頻得爲比仍得爲頻其義皆一然則數比
皆仍辭也

洵 爾雅云信也詩國風洵美且仁

純 專也全也漢書元帝紀漢家自有制度本以霸王
道雜之柰何純任德教用周政乎後漢書黃瓊傳是
故俗論皆言處士純盜虛聲

鈞 與均同晉語然款也不敢愛死唯與讒人均是惡
也韋注云均同也左傳昭公二十八年祁盈之臣曰
鈞將皆死杜注云鈞同也

云 廣雅云辭也詩小雅伊誰云憎論語玉帛云乎哉
左傳僖公十五年歲云秋矣成公十二年日云暮矣
漢書鄒陽傳又非有奇怪云以待難也諸云字竝語
助猶曰也廣雅云辭者謂助辭也又漢書蕭望之傳
今將軍規撫云若管晏而休遂行日昃至周召乃畱
乎云若猶言將若亦語辭也又荀子榮辱篇巨塗則
讓小塗則殆雖欲不謹若云不使楊注云雖欲爲不

敬謹若有制物而不使之者蓋訓云爲有陸士龍詩
公之云感貽此音翰李善云云有也又班孟堅東都
賦烏覩大漢之云爲乎云爲猶云所爲又漢元帝卦
甘延壽詔所以優游而不征者重勤師眾勞將率故
隱忍而未有所云也未有所云猶云未有所如何省
文也又漢書汲黯傳上曰吾欲云云師古云云猶
言如此如此也史畧其辭巨又漢書王莽傳課功絳
霍造之與囚也比于青戎地之與天也而公又有宰
治之效乃當上與伯禹周公等盛齊隆兼其褒賞豈
特與若云者同日而論哉師古云若云謂若向者所
云絳霍青戎也愚案若云者該括之辭又通員詩國
風聊樂我員孔疏云員音云本亦作云言且畱可以
樂我云也正字通云石鼓文君子員獵員遊是也愚
案員獵員遊猶云載獵載遊也

元 詩正義云比賦興吳札觀詩已不歌明其先無別
體不可歌也孔子錄詩已合風雅頌中明其先無別
體不可分也元來合而不分今日難復摘別也顧氏
日知錄云元者本也本官曰元官本籍曰元籍本來

曰元來唐宋人多此語後人以原字代之不知何解
原者再也易原筮禮記月令原蠶文王世子未有原
漢原廟之原皆作再字解與本來之義全不相同愚
案原有推原之義亦可作本字解易原筮之原乃推
原之原訓再者先儒之誤也

原 爾雅云再也

爰 爾雅云粵于爰曰也又云爰粵于也郭注云轉相
訓邢疏云皆謂語辭發端轉互相訓也書洪範土爰
稼穡漢書師古注云爰亦曰也詩國風爰有寒泉鄭

箋云爰曰也愚案土曰稼穡則爰字爲語助曰有寒
泉則爰字爲發語辭也漢書禮樂志雷電爰獲白麟
爰五止顯黃德師古云爰發語辭又漢書食貨志下
田三歲更耕之自爰其處孟康云爰於也成許后傳
推誠永究爰何不臧師古云爰于也于何不善言何
事而不善也後漢書班固傳伊考自遠古乃降戾爰
茲此言自遠古以來至於今也又書盤庚我王來旣
爰宅于茲孔傳云爰於也正義云我先王初居此者
從舊都來於是宅于此地也說命爰立作相孔傳云

於是禮命立以爲相也愚案此二條與單訓爲於義別又史記司馬相如傳文王改制爰周邛隆索隱云爰於及也愚案爰於及也者言爰是於辭及辭也此爰字當訓作及

翻 反也李義山詩本以亭亭遠翻嫌脈脈疏又云千騎君翻在上頭

言 易師卦六五田有禽利執言朱子本義云言語辭也詩國風言告師氏言告言歸朱傳云言辭也愚案言猶云也毛傳訓爲我蓋引爾雅之文恐非如詩焉

得諼草言樹之背言念君子溫其如玉駕言出遊以寫我憂諸言字竝是語助不爲義也又易繫辭德言盛禮言恭本義云言德欲其盛禮欲其恭也愚案此兩語中似有兩欲字之義然此言字亦是語助非可竟訓作欲字也又孟子詩云刑于寡妻至于兄弟以御于家邦言舉斯心加諸彼而已又云詩云旣醉以酒旣飽以德言飽乎仁義也此言字訓釋之辭也

渾 全也杜子美詩白頭梳更短渾欲不勝簪單 詩小雅邠幅在下孔疏云左傳桓二年曰帶裳幅

寫內則亦單云偏則此服名偏而已愚案單猶祗也
又虞書蔡注云在位通計百單一年百單一年即百
有一年奇零之辭也

安 禮記檀弓吾將安仰漢文帝詔其咎安在正字通

云與焉同安之于焉猶何之于曷愚案安亦訓為何
安得為焉者聲相近也安得為何者安有甯義甯何
義相通也又荀子勸學篇上不能好其人下不能隆
禮安特將學雜識志順詩書而已耳楊注云安語助
猶言抑也或作安或作案戰國策秦與韓為上交秦

禍案移于梁矣秦與梁為上交秦禍案攘于趙矣注
云呂氏春秋吳起謂商文曰今置質為臣其主安重
釋璽辭官其主安輕蓋當時人通以安為語助或方
言耳又荀子榮辱篇糧會天侈不顧其後俄則屈安
窮矣楊注云屈安窮猶云屈然窮也

端 漢書成許后傳妾薄命端遇竟甯前師古云端正
也言不得以他時為比例而正依竟甯前也又鮑明
遠詩容華坐消歇端為華髮侵韓退之詩端來問奇
字為我講形聲此端字猶云定也今云端昉如何是

定如何也高觀國祝英臺近詞魂夢西風端的此心
苦端的確辭也又李義山詩錦瑟無端五十弦又云
今古無端入望中無端猶云無故不知其然之辭
判 與拌同俗作揀楊子雲方言楚人揮棄物謂之拌
杜子美詩縱飲久判人共棄溫庭筠詩夜聞猛雨判
花盡今人云判得如此猶言自分如此蓋計度絕望
之辭

還

廣韻云復也荀子王霸篇如是則舜禹還至王業
還起楊注云還復也又世說時人卽以王理難裴理


還復申還復重言也然還亦有仍義理還復申若云
理仍復申也韓退之論變鹽法事宜狀平叔云變法
之後歲計必有所餘日月還恐不足黃家賊事宜狀
今所用嚴公素者亦非撫馭之才不能別立規模依
前還請攻討此還字兼仍復二義又魏志陳思王傳
注以孔璋之才不閑辭賦而多自謂與司馬長卿同
風譬畫虎不成還爲狗者也此還字反辭也

難

左傳昭公十年忠爲令德其子弗能任罪猶及之
難不慎也顧氏補正云言不可不慎也

助字辨略卷之一終

嘉興李文杏實庵校



104
201

